

Menterjemah semula

Berita Harian 26/05/2010

Generasi muda Sarawak perlu ambil iktibar kebera

semangat juang Rosli Dhoby

M/S 20

ranian tokoh pejuang untuk perbaiki tahap pendidikan, ekonomi

Dr Jeniri

Amir



jamir@fss.unimas.my



ROSLI Dhoby
(tengah) ditahan
oleh Inggris
sebelum menjalani
hukuman gantung
sampai mati pada
1950.

NAMA pejuang kebebasan, Rosli Dhoby tiba-tiba menjelma menjelang pilihan raya kecil Parlimen Sibul baru-baru ini. Saya mula membangkitkan nama Rosli dalam kolum ini empat minggu lalu dengan harapan untuk menimbulkan kesedaran adakah pengorbanan anak muda dalam membebaskan Sarawak daripada cengkaman penjajah itu dimanifestasikan dalam bentuk kemajuan ekonomi kaum Bumiputera.

Atau siapakah sebenarnya yang lebih banyak mendapat manfaat daripada pengorbanan beliau itu? Bagi generasi muda dan kebanyakan rakyat Malaysia, nama Rosli begitu asing di telinga mereka. Tetapi, nama itu begitu penting, sama penting seperti nama Wong Nai Siong di kalangan masyarakat Foochow.

Di bilik gerakan Pas di Kampung Hilir, Sibul terpampang gambar Rosli dengan kata-kata 'Berani Berubah, Tolak Penjajahan Baharu' ketika pilihan raya baru-baru ini. Bagi orang Melayu dan Melanau di Sibul, Rosli begitu penting dan sentiasa menyemarakkan sentimen perjuangan tinggi.

Jika Wong Nai Siong, peneroka yang membawa orang Foochow dari China ke Sibul pada 1901 hidup kembali di bandar 270,000 penduduk itu, beliau pasti amat gembira dengan kedudukan ekonomi cucu cicit beliau yang memiliki sebahagian besar kedai dan bangunan komersial utama di bandar Foochow itu.

Sebaliknya, Rosli tentu sedih dan kecewa melihat betapa masyarakat Melanau dan Melayu masih terpinggir dan menjadi masyarakat subaltern di tengah-tengah dominasi Foochow meskipun mereka berkorban jiwa raga 60 tahun lalu. Hanya segelintir daripada masyarakat Melayu/Melanau memiliki bangunan komersial dan kedai meskipun mereka menerajui negeri ini lebih 40 tahun lalu.

Pemimpin pembangkang Datuk Seri Anwar Ibrahim turut mengadakan ceramah sempena memperingati Rosli Dhoby di Kampung Bandung tempoh hari. Perdana Menteri Datuk Seri Najib Razak, turut tidak melepaskan peluang melawat kubur pejuang itu. Kubur Rosli bersama-sama Morshidi Sidek, Awang Rambli Amit, dan Bujang Suntong, yang turut didapati bersalah membunuh gabenor penjajah, dipindahkan dari Kuching ke Sibul pada 26 Mac 1996.

Upacara penuh adat istiadat itu sebagai bukti pengiktirafan kerajaan Sarawak terhadap perjuangan dan pengorbanan mereka. Keranda mereka diterbangkan menggunakan pesawat Nuri diselimuti bendera negeri bagi memenuhi salah satu wasiat Rosli kepada keluarga sebelum ke tali gantung. Di pekarangan Masjid An-Nur, Sibul sebanyak 5,000 orang menyaksikan upacara bersejarah itu.

Siapakah Rosli Dhoby? Rosli Dhoby adalah anak muda Melanau kelahiran Kampung Pulo, Sibul pada 1932. Beliau menikam perut gabenor penjajah Sarawak Duncan George Stewart, gabenor kedua British. Rosli melakukan tikaman ke arah perut gabenor itu dengan badik sekitar jam 9.30 pagi, 3 Disember 1949 ketika kunjungannya ke Sibul. Duncan Stewart dihantar ke Singapura untuk menerima rawatan, tetapi meninggal dunia tujuh hari kemudian.

Rosli, seorang anggota Rukun 13 dalam Gerakan Pemuda Melayu Sarawak (GPMS) bagi menentang penjajah British. Rukun 13, yang ditubuhkan untuk membunuh Duncan Stewart, terdiri daripada anak muda yang berani dan sanggup menggadaikan nyawa demi kemerdekaan tanah air.

Gabenor itu adalah dalam rangka lawatan keseluruhan bahagian jajahannya di Sarawak. Usia Rosli ketika menghunuskan badik ke perut pemimpin penjajah itu baru 17 tahun, tetapi

semangat juang menentang British yang ingin kembali menguasai Sarawak selepas Perang Dunia Kedua begitu sembara di dadanya.

Akhirnya, bekas guru itu didapati bersalah menikam sampai mati Gabenor British kedua Sarawak. Perbicaraan ke atas Rosli dan rakannya Morshidi dilakukan di Mahkamah Tinggi Sibu mulai pertengahan Januari hingga awal Februari 1950. Mereka didapati bersalah dan dijatuhkan hukuman mati, namun dibenarkan mengemukakan rayuan di mahkamah lebih tinggi di Kuching. Selang tiga hari selepas rayuan gagal, mereka pun menjalani hukuman gantung.

Antara kandungan surat terakhir Rosli Dhoby yang ditujukan kepada keluarganya sehari sebelum digantung, berbunyi: "Selamat berpisah anakanda ucapkan di atas kematian anakanda yang dahsyat. Janganlah diingat-ingat dan dirayukan kerana itu memang sudah nasib dan takdir anakanda yang tak dapat dielakkan dan dimungkirkan lagi, dan selimutilah jenazah anakanda dengan Panji Kebangsaan Sarawak."

Bagi memperingati jasa dan pengorbanan pejuang kemerdekaan itu, sebatang jalan dan sebuah sekolah menengah di Sibu diberi sempena nama beliau. Dan, sesiapa yang pernah berkunjung ke Tugu Pahlawan di pekarangan Muzium Sarawak, Kuching, pasti bangga melihat nama beliau turut diabadikan di situ bersama-sama dengan pejuang lain seperti Datuk Merpati Jepang, Pehin Orang Kaya Setia Raja Abang Manai, Liu Shanbang, Sawing, Rentap, Sherip Mashor, Datuk Patinggi Ali, dan Tunku Abdul Rahman Putra Al-Haj.

Perjuangan Rosli tentu akan lebih bererti jika usaha serius diambil mendokumentasi-



JASAD Rosli Dhoby dan rakannya yang dihukum gantung 46 tahun lalu dikeluarkan dari Penjara Pusat Kuching dan dikebumikan semula di Sibu pada 2 Mac 1996.

kan perjuangannya dalam bentuk buku sejarah dan menyeluruh meskipun wujud usaha Rudi Affendi Khalik merakamkan perjuangan beliau sebelum ini. Sebatang jalan utama di Kuching perlu diberi sempena nama pejuang kemerdekaan yang berhati waja itu.

Dengan itu, generasi muda akan lebih memahami perjuangan dan pengorbanan beliau. Semangat perjuangan dan keberanian Rosli

perlu diterjemahkan dalam bentuk baru. Generasi muda perlu berani berjuang dan berkorban untuk memperbaiki tahap pendidikan dan ekonomi mereka. Pengorbanan Rosli tidak harus disia-siakan, sebaliknya perlu diambil iktibar daripadanya.

Jika Rosli masih hidup hari ini, beliau berusia sekitar 78 tahun. Pada usia itu, Rosli tentu ingin melihat anak cucunya berijya dalam segala

bidang, terutama ekonomi dan pendidikan agar mereka dapat berdiri sama tinggi dan duduk sama rendah dengan kaum lain di Sarawak. Justeru, perjuangan dan pengorbanan Rosli untuk memerdekakan tanah air, wajar diingati dan dihargai dengan cara yang lebih bermakna.

Penulis ialah pensyarah kanan di Fakulti Sains Sosial, Universiti Malaysia Sarawak.



Rosli Dhoby

“*Jika Rosli masih hidup hari ini, beliau berusia sekitar 78 tahun. Pada usia itu, Rosli tentu ingin melihat anak cucunya berjaya dalam segala bidang, terutama ekonomi dan pendidikan agar mereka dapat berdiri sama tinggi dan duduk sama rendah dengan kaum lain di Sarawak”*

“*Rosli tentu sedih dan kecewa melihat betapa masyarakat Melanau dan Melayu masih terpinggir dan menjadi masyarakat subaltern di tengah-tengah dominasi Foochow meskipun mereka berkorban jiwa raga 60 tahun lalu”*